

四庫全書

史部

欽定四庫全書

繹史卷六十三

靈壁縣知縣馬驥撰

王臣亂亡

周公閱

左傳

文公

十四年春頃王崩周公閱與王孫蘇爭政故不

赴凡崩薨不赴則不書禍福不告亦不書懲不敬也周公將與王孫蘇訟于晉王叛王孫蘇而使尹氏與聃啓訟周公于晉趙宣子平王室而復之

召戴公 毛伯衛

左傳

宣公十年

王孫蘇與召氏毛氏爭政使王子捷殺召

戴公及毛伯衛卒立召襄

公羊傳

王札子者何長庶之號也 穀梁傳王札子者當

上之辭也殺召伯毛伯不言其何也兩下相殺也兩下相殺不志乎春秋此其志何也矯王命以殺之非忿怒相殺也故曰以王命殺也以王命殺則何志焉為天下主者天也繼天者君也君之所存者命也為人臣而侵其君之命而用之是不臣也為人君而失其命 十六年是不君也君不君臣不臣此天下之所以傾也

為毛召之難故王室復亂王孫蘇奔晉晉人復之冬晉侯使士會平王室定王享之原襄公相禮殺烝武季私

問其故王聞之召武子曰季氏而弗聞乎王享有體薦  
宴有折俎公當享卿當宴王室之禮也武子歸而講求  
典禮以修晉國之法

國語晉侯使隨會聘於周定王饗之穀烝原公相禮范  
子私於原公曰吾聞王室之禮無毀折今此何禮也王  
見其語也召原公而問之原公以告王召士季曰子弗  
聞乎郊禘之事則有全烝王公立飫則有房烝親戚宴  
饗則有穀烝今女非它也而叔父使士季實來修舊德

以獎王室唯是先王之宴禮欲以貽女余一人敢設飫  
褻焉忠非親禮而干舊職以亂前好且唯夫戎翟則有  
體薦夫戎翟冒沒輕儻貪而不讓其血氣不治若禽獸  
焉其適來班貢不俟馨香嘉味故坐諸門外而使舌人  
體委與之女今我王室之一二兄弟以時相見將蘇協  
典禮以示民訓則無亦擇其柔嘉選其馨香潔其酒醴  
品其百籩修其簋簋奉其犧象出其尊彝陳其鼎俎靜  
其中羣敬其祓除體解節折而共飲食之於是乎有折

俎加豆酬幣宴貨以示容合好胡有孑然其效戎翟也  
夫王公諸侯之有飫也將以講事成章建大德昭大物  
也故立成禮烝而已飫以顯物宴以食好歲飫不倦時  
宴不淫月會旬修日完不忘服物昭庸采飾顯明文章  
比象周旋序順容貌有崇威儀有則五味實氣五色精  
心五聲昭德五義紀宜飲食可饗餼同可觀財用可嘉  
則順而建德古之善禮者將焉用全烝武子遂不敢對  
而退歸乃講聚三代之典禮於是乎修執秩以為晉法

○有典有則  
謨誥之遺

劉康公

左傳

文公十七年

秋周甘歆敗戎于郊垂乘其飲酒也

公成

元年春晉侯使瑕嘉平戎于王單襄公如晉拜成劉康公徼戎將遂伐之叔服曰背盟而欺大國此必敗背盟不祥欺大國不義神人弗助將何以勝不聽遂伐茅戎

三月癸未敗績于徐吾氏秋王人來告敗

公羊傳孰敗之蓋晉敗之

或曰賀戎敗之然則曷為不言晉敗之王者無敵莫敢當也  
穀梁傳不言戰莫之敢敵也為尊者諱敵不諱

敗為親者諱敗不諱敵尊尊親親之義也然則孰敗之晉也。以賀戎為晉恐未然

### 周公楚

左傳

成公十一年

周公楚惡惠襄之偪也且與伯與爭政不

勝怒而出及陽樊王使劉子復之盟于鄆而入三日復

出奔晉 十二年春王使以周公之難來告書曰周公

出奔晉凡自周無出周公自出故也

公羊傳周公者何天子之三公也王

者無外此其言出何自其私土而出也穀梁傳周有入無出其曰出上下一見之也言其上下之道無以存也上雖失之下孰敢有之今上下皆失之矣



成肅公

左傳

十三年

公及諸侯朝王遂從劉康公成肅公會晉侯

伐秦成子受賑于社不敬劉子曰吾聞之民受天地之

中以生所謂命也是以有動作禮義威儀之則以定命

也能者養之以福不能者敗以取禍是故君子勤禮小

人盡力勤禮莫如致敬盡力莫如敦篤敬在養神篤在

守業國之大事在祀與戎祀有執膳戎有受賑神之

節也今成子惰棄其命矣其不反乎成肅公卒于瑕

公羊

傳其言自京師何公鑿行也公鑿行奈何不敢過天子也穀梁傳公如京師不月月非如也非如而曰如不叛京師也言受命不敢叛周也

### 王叔陳生

左傳

襄公五年

王使王叔陳生勸戎於晉晉人執之士魴如

京師言王叔之貳於戎也

十年

王叔陳生與伯輿爭政

王右伯輿王叔陳生怒而出奔及河王復之殺史狡以說焉不入遂處之晉侯使士匄平王室王叔與伯輿訟焉王叔之宰與伯輿之大夫瑕禽坐獄於王庭士匄聽

之王叔之宰曰篳門閨竇之人而皆陵其上其難為上矣瑕禽曰昔平王東遷吾七姓從王牲用備具王賴之而賜之駢旒之盟曰世世無失職若篳門閨竇其能來東底乎且王何賴焉今自王叔之相也政以賄成而刑放於寵官之師旅不勝其富吾能無篳門閨竇乎唯大國圖之下而無直則何謂正矣范宣子曰天子所右寡君亦右之所左亦左之使王叔氏與伯輿合要王叔氏不能舉其契王叔奔晉不書不告也單靖公為卿士以

相王室

僖括

左傳

三十一年

初王僖季卒其子括將見王而歎單公子愆

期為靈王御士過諸廷聞其歎而言曰烏乎必有此夫

入以告王且曰必殺之不感而願大視躁而足高心在

他矣不殺必害王曰童子何知及靈王崩僖括欲立王

子佞夫佞夫弗知戊子僖括圍蒍逐成愆成愆奔平時

五月癸巳尹言多劉毅單蔑甘過鞏成殺佞夫括瑕廖

奔晉書曰天王殺其弟佞夫罪在王也

穀梁傳傳曰諸侯且不首惡况

於天子乎君無忍親之義天子諸侯所親者唯長子母弟耳天王殺其弟佞夫甚之也

單獻公 單成公

左傳

昭公七年

單獻公棄親用羈冬十月辛酉襄頃之族殺

獻公而立成公

十一年

單子會韓宣子于戚視下言徐

叔向曰單子其將死乎朝有著定會有表衣有禴帶有結會朝之言必聞於表著之位所以昭事序也視不過結禴之中所以道容貌也言以命之容貌以明之失則

有廢今單子為王官伯而命事於會視不登帶言不過步貌不道容而言不昭矣不道不共不昭不從無守氣矣十二月單成公卒

原伯絞 甘悼公

左傳

十二年

周原伯絞雲其輿臣使曹逃冬十月壬申朔

原輿人逐絞而立公子跪尋絞奔郊 甘簡公無子立其弟過過將去成景之族成景之族賂劉獻公丙申殺甘悼公而立成公之孫鮒丁酉殺獻太子之傅庾皮之

子過殺瑕辛于市及宮嬖綽王孫沒劉州鳩陰忌老陽子

鞏簡公

左傳

定公元年

周鞏簡公棄其子弟而好用遠人

二年夏

四月辛酉鞏氏之羣子弟賊簡公

昔者厲王流彘周召共政號曰共和或曰共伯名和攝行天子事也其時王室昏亂大臣猶能和睦以安定國家宣王中興則有若甫侯若樊仲若召武方叔

詩人美馬降而東遷天子慎選三公嘗兼冢宰猶遵  
先王之舊制故會盟出使必繫之宰重其任也王臣  
私交始於祭伯之來諸侯用王師始於單伯之伐宋  
春秋謹而書之以記世道之變鄭統為卿士廢置在  
王樊皮之叛旋就執焉未有如匡定簡靈以後爭訟  
繁興專殺相尋左史所記何若是紛紛也周公天子  
之三公也召毛周室之世臣也自王孫蘇亂之一朝  
而尸二卿經曰王札子傳曰蘇實使之春秋著兩下



相殺之文明乎殺二臣者在下不在上也嗣是以後  
單子甘鞏皆相繼弗獲考死矣自伯與亂之大臣不  
安其位怒而不反春秋惡其自絕書曰出奔然而周  
公不繫之宰權號去矣即尹劉之會諸侯無異於晉  
六卿魯三桓也嗣是以後王叔原伯皆相繼而越在  
侯國矣景王初立殺其弟佞夫儋括之欲為亂也佞  
夫弗知王之翦之也亦甚亟矣至於暮年儲位不定  
用生子朝之亂日見兄弟之戕害大臣之分爭也終

乎春秋之世亂靡有止周室尚可為哉然則周之衰  
也不在諸侯之不睦而在大臣之不和不在大臣之  
不和而在骨肉之相殘也春秋歷十有二王而崩而  
不赴者三大臣之顯者十餘族而或奔或亡者九自  
莊迄敬二百年而王子之亂者六總由王室之無政  
也春秋之作閔魯蕪以閔周也有以夫

繹史卷六十三

欽定四庫全書

繹史卷六十四

靈壁縣知縣馬驥撰

晉悼公復霸

國語晉孫談之子周適周事單襄公立無跛視無還聽  
無聳言無遠言敬必及天言忠必及意言信必及身言  
仁必及人言義必及利言知必及事言勇必及制言教  
必及辯言孝必及神言惠必及餼言讓必及敵晉國有  
憂未嘗不戚有慶未嘗不怡襄公有疾召頃公而告之

曰必善晉周將得晉國其行也文能文則得天地天地所胙小而後國夫敬文之恭也忠文之實也信文之孚也仁文之愛也義文之制也知文之輿也勇文之帥也教文之施也孝文之本也惠文之慈也讓文之材也象天能敬帥意能忠思身能信愛人能仁利制能義事建能知帥義能勇施辯能教昭神能孝慈能惠推敵能讓此十一者夫子皆有焉天六地五數之常也經之以天緯之以地經緯不爽文之象也文王質文故天祚之

以天下夫子被之矣其昭穆又近可以得國且夫立無  
跛正也視無還端也聽無聳成也言無遠慎也夫正德  
之道也端德之信也成德之終也慎德之守也守終純  
固道正事信明令德矣慎成端正德之相也為晉休戚  
不背本也被文相德非國何取成公之歸也吾聞晉之  
筮之也遇乾之否曰配而不終君三出焉一既往矣後  
之不知其次必此且吾聞之成公之生也其母夢神規  
其臀以墨曰使有晉國三而畀驩之孫故名之曰黑臀

於今再矣襄公曰驩此其孫也而令德孝恭非此其誰  
且其夢曰必驩之孫實有晉國其卦曰必三取君於周  
其德又可以君國三襲焉吾聞之大誓故曰朕夢協于  
朕卜襲于休祥戎商必克以三襲也晉仍無道而鮮胄  
其將失之矣必蚤善晉子其當之也頃公許諾及厲公  
之亂召周子而立之是為悼公

左傳

成公十年

使荀瑩士魴逆周子于京師而立之生十

四年矣大夫逆于清原周子曰孤始願不及此雖及此

豈非天乎抑人之求君使出命也立而不從將安用君  
二三子用我今日否亦今日共而從君神之所福也對  
曰羣臣之願也敢不唯命是聽庚午盟而入館于伯子  
同氏辛巳朝于武宮逐不臣者七人周子有兄而無慧  
不能辨菽麥故不可立 二月乙酉朔晉悼公即位于  
朝始命百官施舍已責逮鰥寡振廢滯匡乏困救災患  
禁淫慝薄賦斂宥罪戾節器用時用民欲無犯時使魏  
相士魴魏頡趙武為卿荀家荀會樂厲韓無忌為公族



大夫使訓卿之子弟共儉孝弟使士渥濁為大傅使修  
范武子之法右行辛為司空使修士為之法弁糾御戎  
校正屬馬使訓諸御知義荀賓為右司士屬馬使訓勇  
力之士時使卿無共御立軍尉以攝之祁奚為中軍尉  
羊舌職佐之魏絳為司馬張老為候奄鐸遏寇為上軍  
尉籍偃為之司馬使訓卒乘親以聽命程鄭為乘馬御  
六駟屬馬使訓羣駟知禮凡六官之長皆民譽也舉不  
失職官不易方爵不踰德師不陵正旅不偪師民無謗

言盱以復霸也

國語既殺厲公欒武子使知武子彘恭子如周迎悼公  
庚午大夫逆於清原公言於諸大夫曰孤始願不及此  
孤之及此天也抑人之有元君將稟命焉若稟而棄之  
是焚穀也其稟不材是穀不成也穀之不成孤之咎也  
成而焚之二三子之害也孤欲長處其願出令將不敢  
不成二三子為令之不從故求元君而訪焉孤之不元  
廢也其誰怨元而以害奉之二三子之制也若欲奉元

以濟大義將在今日若欲暴雲以離百姓反易民常亦  
在今日圖之進退願由今日大夫對曰君鎮撫羣臣而  
大庇蔭之無乃不堪君訓而陷於大戮以煩刑吏辱君  
之允令敢不承業乃盟而入辛巳朝於武宮定百事立  
百官育門子選賢良興舊族出滯賞畢故刑赦囚繫宥  
閒罪薦積德逮鰥寡振廢淹養老幼恤孤疾年過七十  
者公親見之稱曰王父王父不敢不承二月乙酉公即  
位使呂宣子佐下軍曰邲之役呂錡佐知莊子於上軍

獲楚公子穀臣與連尹襄老以免子羽騶之役親馘楚  
王而敗楚師以定晉國而無後其子孫不可不崇也使  
彘恭子將新軍曰武子之季文子之母弟也武子宣法  
以定晉國至於今是用文子勤身以定諸侯至於今是  
賴夫二子之德其可忘乎故以彘季屏其宗使令狐文  
子佐之曰昔克潞之役秦來圖敗晉功魏顆以其身卻  
還秦師於輔氏親止杜回其勲銘於景鐘至於今不育  
其子不可不興也君知士貞子之帥志博聞而宣惠於

教也使為大傅知右行辛之能以數宣物定功也使為  
司空知樂糾之能御以蘇於政也使為戎右樂伯請公族大夫公曰荀賓之  
有力而不暴也使為戎右樂伯請公族大夫公曰荀家  
惇惠荀檜文敏鷹也果敢無忌鎮靖使茲四人者為之  
夫膏粱之性難正也故使惇惠者教之使文敏者道之  
使果敢者諗之使鎮靖者修之惇惠者教之則徧而不  
倦文敏者道之則婉而入果敢者諗之則過不隱鎮靖  
者修之則壹使茲四人者為公族大夫公知祁奚之果

而不淫也使為元尉知羊舌職之聰敏肅給也使佐之  
知魏絳之勇而不亂也使為元司馬知張老之知而不  
詐也使為元侯知鐸遏寇之恭敬而信彊也使為輿尉  
知籍偃之惇率舊職而共給也使為輿司馬知程鄭端  
而不淫且好諫而不隱也使為贊僕始合諸侯於虛朶  
以救宋使張老延君譽於四方且觀道逆者呂宣子卒  
公以趙文子為文也而能恤大事使佐新軍三年公始  
合諸侯四年諸侯會於雞丘於是乎布令結援修好申

盟而還令狐文子卒公乃以魏絳為不犯使佐新軍使

張老為司馬使范獻子為候奄公譽達於戎五年諸戎

來請服使魏莊子盟之於是乎始復伯

史記智瑩遜公  
子周來至絳刑

雞與大夫盟而立之是為悼公悼公周者其大父捷晉

襄公少子也不得立號為桓叔桓叔最愛桓叔生惠伯

談談生悼公周之立年十四矣悼公曰大父父皆不

得立而避難於周客死焉寡人自以踈遠母幾為君今

大夫不忘文襄之意而惠立桓叔之後賴宗廟大夫之

靈得奉晉祀豈敢不戰戰乎大夫其亦佐寡人於是逐

不臣者七人修舊功施德  
惠收文公入時功臣後

左傳公如晉朝嗣君也公至自晉晉范宣子來聘且拜

朝也君子謂晉於是乎有禮

襄公元年夏五月晉韓厥荀

偃帥諸侯之師伐鄭入其郛敗其徒兵於洧上於是東諸侯之師次於郟以待晉師晉師自鄭以郟之師侵楚焦夷及陳晉侯衛侯次于戚以為之援秋楚子辛救鄭侵宋呂畱鄭子然侵宋取犬丘 二年春鄭師侵宋楚令也 鄭成公疾子駟請息肩於晉公曰楚君以鄭故親集矢於其目非異人任寡人也若背之是棄力與言其誰暱我免寡人唯二三子秋七月庚辰鄭伯踰卒於



是子罕當國子駟為政子國為司馬晉師侵鄭諸大夫

欲從晉子駟曰官命未改

穀梁傳其曰衛甯殖如是而稱于前事也

會于

戚謀鄭故也孟獻子曰請城虎牢以徧鄭知武子曰善

卽之會吾子聞崔子之言今不來矣滕薛小邾之不至

皆齊故也寡君之憂不唯鄭瑩將復于寡君而請於齊

得請而告吾子之功也若不得請事將在齊吾子之請

諸侯之福也豈唯寡君賴之冬復會于戚齊崔武子及

滕薛小邾之大夫皆會知武子之言故也遂城虎牢鄭

人乃成

公羊傳虎牢者何鄭之邑也其言城之何取之也取之則曷為不言取之為中國諱也曷為為

中國諱諱代喪也曷為不繫子鄭為中國諱也大夫無遂事此其言遂何歸惡乎大夫也穀梁傳若言中國

馬內鄭也

楚公子申為右司馬多受小國之賂以偪子重

子辛楚人殺之故書曰楚殺其大夫公子申

三年晉為

鄭服故且欲修吳好將合諸侯使士匄告於齊曰寡君

使匄以歲之不易不虞之不戒寡君願與一二兄弟相

見以謀不協請君臨之使匄乞盟齊侯欲勿許而難為

不協乃盟于郟外 祁奚請老晉侯問嗣焉稱解狐其

雖也將立之而卒又問焉對曰午也可於是羊舌職死  
矣晉侯曰孰可以代之對曰赤也可於是使祁午為中  
軍尉羊舌赤佐之君子謂祁奚於是能舉善矣稱其讎  
不為詔立其子不為比舉其偏不為黨商書曰無偏無  
黨王道蕩蕩其祁奚之謂矣解狐得舉祁午得位伯華  
得官建一官而三物成能舉善也夫唯善故能舉其類  
詩云惟其有之是以似之祁奚有焉

國語祁奚辭於軍尉公問焉曰孰可對曰臣之子午可

人有言曰擇臣莫若君擇子莫若父午之少也婉以從  
令游有鄉處有盱好學而不戲其壯也彊志而用命守  
業而不淫其冠也鰣安而好敬柔惠小物而鎮定大事  
有直質而無流心非義不變非上不舉若臨大事其可  
以賢於臣也臣請薦所能擇而君比義焉公使祁午為

軍尉沒平公軍無秕政

呂氏春秋晉平公問於祁黃羊曰南陽無令其誰可而為之祁

黃羊對曰解狐可平公曰解狐非子之讎耶對曰君問可非問臣之讎也平公曰善遂用之國人稱善焉居有閒平公又問祁黃羊曰國無尉其誰可而為之對曰午可平公曰午非子之子耶對曰君問可非問臣之子也

平公曰善又遂用之國人稱善焉孔子聞之曰善哉祁黃羊之論也外舉不避讎內舉不避子祁黃羊可謂公矣○此前三事之訛

左傳六月公會單頃公及諸侯己未同盟于雞澤晉侯

使荀會逆吳子于淮上吳子不至

穀梁傳同者有同也同外楚也

楚

子辛為令尹侵欲於小國陳成公使袁僑如會求成晉

侯使和組父告于諸侯秋叔孫豹及諸侯之大夫及陳

袁僑盟陳請服也

公羊傳其言如會何後會也曷為殊及陳袁僑為其與袁僑盟也穀梁

傳如會外乎會也於會受命也及以及與之也諸侯以為可與則與之不可與則釋之諸侯盟又大夫相與私

盟是大夫張也故雞澤之會諸侯始  
夫正矣大夫執國權曰袁僑異之也

晉侯之弟揚干

亂行于曲梁魏絳戮其僕晉侯怒謂羊舌赤曰合諸侯  
以為榮也揚干為戮何辱如之必殺魏絳無失也對曰  
絳無貳志事君不辟難有罪不逃刑其將來辭何辱命  
焉言終魏絳至授僕人書將伏劍士魴張老止之公讀  
其書曰日君乏使使臣斯司馬臣聞師衆以順為武軍  
事有死無犯為敬君合諸侯臣敢不敬君師不武執事  
不敬罪莫大焉臣懼其死以及揚干無所逃罪不能致

訓至于用鉞臣之罪重敢有不從以怒君心請歸死於  
司寇公跣而出曰寡人之言親愛也吾子之討軍禮也  
寡人有弟弗能教訓使干大命寡人之過也子無重寡  
人之過敢以為請晉侯以魏絳為能以刑佐民矣反役  
與之禮食使佐新軍張老為中軍司馬士富為候奄

國語

四年會諸侯於雞邱魏絳為中軍司馬公子揚干亂行  
於曲梁魏絳斬其僕公謂羊舌赤曰寡人屬諸侯魏絳  
戮寡人之弟為我勿失赤對曰臣聞絳之志有事不避  
難有辜不避刑其將來辭言終魏絳至授僕人書而伏  
劍士魴張老交止之僕人授公公讀書曰臣誅於揚干  
不忘其死日君乏使使臣狙中軍之司馬臣聞師衆以

順為武軍事有死無犯為敬君合諸侯臣敢不敬君不  
說請死之公跣而出曰寡人之言兄弟之禮也子之誅  
軍旅之事也請無重寡人之過反役與之禮食令之佐  
新軍說苑趙宣子言韓獻子於晉侯曰其為人黨  
治衆不亂臨死不恐晉侯以為中軍尉河曲之役趙宣  
子之車干行韓獻子戮其僕人皆曰韓獻子必死矣其  
主朝昇之而暮戮其僕誰能待之役罷趙宣子觴大夫  
爵三行曰二三子可以賀我二三子曰不知所賀宣子  
曰我言韓厥於君言之而不當必受其刑今吾軍失次  
而戮之僕可謂不黨矣是吾言當也二三子再拜稽首  
曰不惟晉國遼享之乃唐叔是賴之敢不再拜稽首  
○此前事之訛國語悼公使張老為卿辭曰臣不如  
魏絳夫絳之知能治大官其仁可以利公室不忘其勇  
不疚於刑其學不廢其先人之職若在卿位外內必平  
且雞邱之會其官不犯而辭順不可不賞也  
公五命之固辭乃使為司馬使魏絳佐新軍

楚司馬



公子何忌侵陳陳叛故也 許靈公事楚不會于雞澤

冬晉知武子帥師伐許 四年春楚師為陳叛故猶在

繁陽韓獻子患之言於朝曰文王帥殷之叛國以事紂

唯知時也今我易之難哉三月陳成公卒楚人將伐陳

聞喪乃止陳人不聽命臧武仲聞之曰陳不服於楚必

亡大國行禮焉而不服在大猶有咎而况小乎夏楚彭

名侵陳陳無禮故也 楚人使頓閒陳而侵伐之故陳

人圍頓 無終子嘉父使孟樂如晉因魏莊子納虎豹

之皮以請和諸戎晉侯曰戎狄無親而貪不如伐之魏絳曰諸侯新服陳新來和將觀於我我德則睦否則攜貳勞師於戎而楚伐陳必弗能救是棄陳也諸華必叛戎禽獸也獲戎失華無乃不可乎夏訓有之曰有窮后羿公曰后羿何如對曰昔有夏之方衰也后羿自鉏遷于窮石因夏民以代夏政恃其射也不修民事而淫於原獸棄武羅伯因熊髡龙圉而用寒浞寒浞伯明氏之讒子弟也伯明后寒棄之夷羿收之信而使之以為己

相浞行媚于內而施賂于外愚弄其民而虞羿于田樹  
之詐慝以取其國家外內咸服羿猶不悛將歸自田家  
衆殺而烹之以食其子其子不忍食諸死于窮門靡奔  
有鬲氏浞因羿室生澆及豷恃其讒慝詐偽而不德於  
民使澆用師滅斟灌及斟尋氏處澆于過處豷于戈靡  
自有鬲氏收二國之燼以滅浞而立少康少康滅澆于  
過后杼滅豷于戈有窮由是遂亡失人故也昔周辛甲  
之為大史也命百官官箴王闕于虞人之箴曰芒芒禹

迹畫為九州經啟九道民有寢廟獸有茂草各有攸處  
德用不擾在帝夷羿冒于原獸忘其國恤而思其麀牡  
武不可重用不恢於夏家獸臣司原敢告僕夫虞箴如  
是可不懲乎於是晉侯好田故魏絳及之公曰然則莫  
如和戎乎對曰和戎有五利焉戎狄荐居貴貨易土土  
可賈焉一也邊鄙不聳民狎其野穡人成功二也戎狄  
事晉四隣振動諸侯威懷三也以德綏戎師徒不勤甲  
兵不頓四也鑒于后羿而用德度遠至邇安五也君其

圖之公說使魏絳盟諸戎修民事田以時

國語五年無終子嘉父使

孟樂因魏莊子納虎豹之皮以蘇諸戎公曰戎翟無親而好得不若伐之魏絳曰勞師於戎而失諸華雖有功猶得獸而失人也安用之且夫戎翟荐處貴貨而易土與之貨而獲其土其利一也邊鄙耕農不做其利二也戎翟事晉四隣莫不震動其利三也君其圖之公說故使魏絳撫諸戎於是乎遂伯

五年楚人討

陳叛故曰由令尹子辛實侵欲焉乃殺之書曰楚殺其

大夫公子壬夫貪也君子謂楚共王於是不刑詩曰周

道挺挺我心烏烏講事不令集人來定已則無信而殺

人以逞不亦難乎夏書曰成允成功 九月丙午盟於

戚會吳且命戍陳也

公羊傳吳何以稱人吳鄆人云則不辭孰戍之諸侯戍之曷為不言

諸侯戍之離至不可得而序故言我也

穀梁傳內辭也

楚子囊為令尹范宣子

曰我喪陳矣楚人討貳而立子囊必改行而疾討陳陳

近於楚民朝夕急能無往乎有陳非吾事也無之而後

可冬諸侯戍陳子囊伐陳十一月甲午會于城棣以救

之

穀梁傳善救陳也

七年冬十月晉韓獻子告老公族穆子有

廢疾將立之辭曰詩曰豈不夙夜謂行多露又曰弗躬

弗親庶民弗信無忌不才讓其可乎請立起也與田蘇

游而曰好仁詩曰靖共爾位好是正直神之聽之介爾  
景福恤民為德正直為正正曲為直參和為仁如是則  
神聽之介福降之立之不亦可乎庚戌使宣子朝遂老

晉侯謂韓無忌仁使掌公族大夫

國語韓獻子老使公族穆子受事於朝辭

曰厲公之亂無忌偯公族不能死臣聞之曰無功庸者不敢居高位今無忌知不能匡君使至於難仁不能救勇不能死敢辱君朝以忝韓宗請退也固辭不立悼公聞之曰難雖不能死君而能讓不可不賞也使掌公族

大夫

楚子囊圍陳會于鄒以救之陳人患楚慶虎慶寅

謂楚人曰吾使公子黃往而執之楚人從之二慶使告

陳侯于會曰楚人執公子黃矣君若不來羣臣不忍社

稷宗廟懼有二圖陳侯逃歸

穀梁傳以其去諸侯故逃之也

八年春

公如晉朝且聽朝聘之數

庚寅鄭子國子耳侵蔡獲

蔡司馬公子燮鄭人皆喜唯子產不順曰小國無文德

而有武功禍莫大焉楚人來討能勿從乎從之晉師必

至晉楚伐鄭自今鄭國不四五年弗得寧矣子國怒之

曰爾何知國有大命而有正卿童子言焉將為戮矣

公羊

傳此侵也其言獲何侵而言獲者適得之也

穀梁傳人微者也侵淺事也而獲公子公子病矣

韓非子子



產者子國之子也子產忠於鄭君子國譙怒之曰夫介  
異於人臣而獨忠於主主賢明能聽汝不明將不汝聽  
聽與不聽未可必知而汝已離於羣臣離於羣  
臣則必危汝身矣非徒危已也又且危父矣  
五月

甲辰會於邢丘以命朝聘之數使諸侯之大夫聽命季  
孫宿齊高厚宋向戌衛甯殖邾大夫會之鄭伯獻捷于

會故親聽命大夫不書尊晉侯也

穀梁傳見魯之失正也公在而大夫會也

冬楚子囊伐鄭討其侵蔡也子駟子國子耳欲從楚  
子孔子嬖子展欲待晉子駟曰周詩有之曰俟河之清  
人壽幾何兆云詢多職競作羅謀之多族民之多違事

滋無成民急矣姑從楚以紓吾民晉師至吾又從之敬  
共幣帛以待來者小國之道也犧牲玉帛待於二竟以  
待彊者而庇民焉寇不為害民不罷病不亦可乎子展  
曰小所以事大信也小國無信兵亂日至亡無日矣五  
會之信今將背之雖楚救我將安用之親我無成鄙我  
是欲不可從也不如待晉晉君方明四軍無闕八卿和  
睦必不棄鄭楚師遼遠糧食將盡必將速歸何患焉舍  
之聞之杖莫如信完守以老楚杖信以待晉不亦可乎

子駟曰詩云謀夫孔多是用不集發言盈庭誰敢執其咎如匪行邁謀是用不得于道請從楚駢也受其咎乃及楚平使王子伯駢告于晉曰君命敝邑修而車賦倣而師徒以討亂略蔡人不從敝邑之人不敢寧處悉索敝賦以討于蔡獲司馬燮獻于邢丘今楚來討曰女何故稱兵于蔡焚我郊保馮陵我城郭敝邑之衆夫婦男女不遑啟處以相救也翦焉傾覆無所控告民死亡者非其父兄卽其子弟夫人愁痛不知所庇民知窮困而

受盟于楚孤也與其二三臣不能禁止不敢不告知武  
子使行人子員對之曰君有楚命亦不使一介行李告  
于寡君而即安於楚君之所欲也誰敢違君寡君將帥  
諸侯以見於城下唯君圖之 晉范宣子來聘且拜公  
之辱告將用師于鄭公享之宣子賦標有梅季武子曰  
誰敢哉令譬於草木寡君在君君之臭味也歡以承命  
何時之有武子賦角弓賓將出武子賦彤弓宣子曰城  
濮之役我先君文公獻功于衡雍受彤弓于襄王以為

子孫藏匄也先君守官之嗣也敢不承命君子以為知

禮

九年

夏季武子如晉報宣子之聘也

冬十月諸侯

伐鄭庚午季武子齊崔杼宋皇卽從荀瑩士匄門于鄆  
門衛北宮括曹人邾人從荀偃韓起門于師之梁滕人  
薛人從欒黶士魴門于北門杞人從趙武魏絳斬  
行栗甲戌師于汜令於諸侯曰修器備盛餼糧歸老幼  
居疾于虎牢肆青圍鄭鄭人恐乃行成中行獻子曰遂  
圍之以待楚人之救也而與之戰不然無成知武子曰

許之盟而還師以敝楚人吾三分四軍與諸侯之銳以  
逆來者於我未病楚不能矣猶愈于戰暴骨以逞不可  
以爭大勞未艾君子勞心小人勞力先王之制也諸侯  
皆不欲戰乃許鄭成十一月己亥同盟于戲鄭服也將  
盟鄭六卿公子駢公子發公子嘉公孫軌公孫董公孫  
舍之及其大夫門子皆從鄭伯晉士莊子為載書曰自  
今日既盟之後鄭國而不唯晉命是聽而或有異志者  
有如此盟公子駢趨進曰天禍鄭國使介居二大國之

間大國不加德音而亂以要之使其鬼神不獲歆其禋祀其民人不獲享其土利夫婦辛苦墊隘無所底告自今日既盟之後鄭國而不唯有禮與彊可以庇民者是從而敢有異志者亦如之荀偃曰改載書公孫舍之曰昭大神要言焉若可改也大國亦可叛也知武子謂獻子曰我實不德而要人以盟豈禮也哉非禮何以主盟姑盟而退修德息師而來終必獲鄭何必今日我之不德民將棄我豈唯鄭若能休和遠人將至何恃於鄭乃

盟而還晉人不得志於鄭以諸侯復伐之十二月癸亥

門其三門閏月戊寅濟于陰阪侵鄭次於陰口而還子

孔曰晉師可擊也師老而勞且有歸志必大克之子展

曰不可

穀梁傳不異言鄭善得鄭也  
不致耻不能據鄭也

楚子伐鄭子駟將

及楚平子孔子矯曰與大國盟口血未乾而背之可乎

子駟子展曰吾盟固云唯彊是從今楚師至晉不我救

則楚彊矣盟誓之言豈敢背之且要盟無質神弗臨也

所臨唯信信者言之瑞也善之主也是故臨之明神不



蠲要盟背之可也乃及楚平公子罷戎入盟同盟于中  
分楚莊夫人卒王未能定鄭而歸 晉侯歸謀所以息

民魏絳請施舍輸積聚以貸自公以下苟有積者盡出  
之國無滯積亦無困人公無禁利亦無貪民祈以幣更  
賓以特牲器用不作車服從給行之期年國乃有節三  
駕而楚不能與爭

十年夏四月戊午會于柤晉荀偃士

句請伐偃陽而封宋向戌焉荀瑩曰城小而固勝之不  
武弗勝為笑固請丙寅圍之弗克孟氏之臣秦董父輦

重如役偃陽人啟門諸侯之士門焉縣門發邠人紇挾之以出門者狄虎彌建大車之輪而蒙之以甲以為櫓左執之右拔戟以成一隊孟獻子曰詩所謂有力如虎者也主人縣布董父登之及堞而絕之墜則又縣之蘇而復上者三主人辭焉乃退帶其斷以徇於軍三日諸侯之師久於偃陽荀偃士匄請於荀瑩曰水潦將降懼不能歸請班師知伯怒投之以機出於其間曰女成二事而後告余余恐亂命以不女違女旣勤君而興諸侯

牽帥老夫以至於此既無武守而又欲易余罪曰是實  
班師不然克矣余羸老也可重任乎七日不克必爾乎  
取之五月庚寅荀偃士匄帥卒攻偃陽親受矢石甲午  
滅之書曰遂滅偃陽言自會也以與向戌向戌辭曰君  
若猶辱鎮撫宋國而以偃陽光啓寡君羣臣安矣其何  
貺如之若專賜臣是臣興諸侯以自封也其何罪大焉  
敢以死請乃予宋公宋公享晉侯於楚丘請以桑林荀  
瑩辭荀偃士匄曰諸侯宋魯於是觀禮魯有禘樂賓祭

用之宋以桑林享君不亦可乎舞師題以旌夏晉侯懼而退入于房去旌卒享而還及著雍疾卜桑林見荀偃士匄欲奔請禱焉荀瑩不可曰我辭禮矣彼則以之猶有鬼神於彼加之晉侯有閒以偃陽子歸獻于武宮謂之夷俘偃陽妘姓也使周内史選其族嗣納諸霍人禮也師歸孟獻子以秦董父為右生秦丕茲事仲尼穀梁傳遂直遂也其曰遂何不以中國從夷狄也會夷狄不致惡事不致此其致何也存中國也中國有善事

則并焉無善事則異之存之也汲鄭伯逃歸陳侯致祖之會存中國也

左傳六月楚子囊鄭子耳伐宋師于訾母庚午圍宋門于桐門衛侯救宋師于襄牛鄭子辰曰必伐衛不然是不與楚也得罪于晉又得罪于楚國將若之何子駟曰國病矣子辰曰得罪于二大國必亡病不猶愈于亡乎諸大夫皆以為然故鄭皇耳帥師侵衛楚令也孫文子卜追之獻兆于定姜姜氏問繇曰兆如山陵有夫出征

而喪其雄姜氏曰征者喪雄禦寇之利也大夫圖之衛人追之孫蒯獲鄭皇耳于犬丘 秋七月楚子囊鄭子耳侵我西鄙還圍蕭八月丙寅克之九月子耳侵宋北鄙孟獻子曰鄭其有災乎師競已甚周猶不堪競况鄭乎有災其執政之三士乎 諸侯伐鄭齊崔杼使太子光先至于師故長於滕己酉師于牛首諸侯之師城虎牢而戍之晉師城梧及制士魴魏絳戍之書曰戍鄭虎牢非鄭地也言將歸焉鄭及晉平楚子囊救鄭十一月

諸侯之師還鄭而南至于陽陵楚師不退知武子欲退  
曰令我逃楚楚必驕驕則可與戰矣欒黶曰逃楚晉之  
耻也合諸侯以益耻不如死我將獨進師遂進己亥與  
楚師夾潁而軍子矯曰諸侯既有成行必不戰矣從之  
將退不從亦退退楚必圍我猶將退也不如從楚亦以  
退之宵涉潁與楚人盟欒黶欲伐鄭師荀瑩不可曰我  
實不能禦楚又不能庇鄭鄭何罪不如致怨焉而還今  
伐其師楚必救之戰而不克為諸侯笑克不可命不如

還也丁未諸侯之師還侵鄭北鄙而歸楚人亦還

公羊傳孰

戍之諸侯戍之曷為不言諸侯戍之離至不可得而序故言我也諸侯已取之矣曷為繫之鄭諸侯莫之主有

故反繫之鄭穀梁傳其曰鄭虎牢決鄭子虎牢也

十一年鄭人患晉楚之故諸

大夫曰不從晉國幾亡楚弱於晉晉不吾疾也晉疾楚將辟之何為而使晉師致死於我楚弗敢敵而後可固與也子展曰與宋為惡諸侯必至吾從之盟楚師至吾又從之則晉怒甚矣晉能驟來楚將不能吾乃固與晉大夫說之使疆場之司惡於宋宋向戍侵鄭大獲子展



曰師而伐宋可矣若我伐宋諸侯之伐我必疾吾乃聽命焉且告於楚楚師至吾又與之盟而重賂晉師乃免矣夏鄭子展侵宋 四月諸侯伐鄭己亥齊大子光宋向戌先至于鄭門于東門其莫晉荀瑩至于西郊東侵舊許衛孫林父侵其北鄙六月諸侯會于北林師于向右還次于瑣圍鄭觀兵于南門西濟于濟隧鄭人懼乃行成秋七月同盟于亳范宣子曰不慎必失諸侯諸侯道微而無成能無貳乎乃盟載書曰凡我同盟毋蒞年

母壅利母保姦母留慝救災患恤禍亂同好惡獎王室  
或閒茲命司慎司盟名山名川羣神羣祀先王先公七  
姓十二國之祖明神殛之俾失其民隊命亡氏踣其國

家

穀梁傳不以後致  
盟後復伐鄭也

楚子囊乞旅于秦秦右大夫詹

帥師從楚子將以伐鄭鄭伯逆之丙子伐宋九月諸侯  
悉師以復伐鄭鄭人使良霄大宰石彘如楚告將服于  
晉曰孤以社稷之故不能懷君君若能以玉帛綏晉不  
然則武震以攝威之孤之願也楚人執之書曰行人言

使人也

穀梁傳行人者挈國之辭也

諸侯之師觀兵于鄭東門鄭

人使王子伯駢行成甲戌晉趙武入盟鄭伯冬十月丁亥鄭子展出盟晉侯十二月戊寅會于蕭魚庚辰赦鄭囚皆禮而歸之納斥堠禁侵掠晉侯使叔肸告于諸侯公使臧孫紇對曰凡我同盟小國有罪大國致討苟有以藉手鮮不赦宥寡君聞命矣鄭人賂晉侯以師悝師觸師蠲廣車輶車淳十五乘甲兵備凡兵車百乘歌鐘二肆及其罍磬女樂二八晉侯以樂之半賜魏絳曰子

教寡人和諸戎狄以正諸華八年之中九合諸侯如樂之和無所不諧請與子樂之辭曰夫和戎狄國之福也八年之中九合諸侯諸侯無慝君之靈也二三子之勞也臣何力之有焉抑臣願君安其樂而思其終也詩曰樂旨君子殿天子之邦樂旨君子福祿攸同便蕃左右亦是帥從夫樂以安德義以處之禮以行之信以守之仁以厲之而後可以殿邦國同福祿來遠人所謂樂也書曰居安思危思則有備有備無患敢以此規公曰子

之教敢不承命抑微子寡人無以待戎不能濟河夫賞國之典也歲之盟府不可廢也子其受之魏絳於是乎

有金石之樂禮也

國語十二年公伐鄭軍於蕭魚鄭伯嘉來納女工妾三十人女樂二八歌

鐘二肆及寶鏹輅車十五乘公賜魏絳女樂一八歌鐘一肆曰子教寡人蘇戎翟而正諸華於今八年七合諸

侯寡人無不得志請與子共樂之魏絳辭曰夫蘇戎翟臣之幸也八年七合諸侯君之靈也二三子之勞也臣

焉得之公曰微子寡人無以待戎無以濟河二三子何勞焉子其受之君子曰能志善也公羊傳此伐鄭也

其言會于蕭魚何益鄭與會爾穀梁傳十二年夏晉伐而後會不以伐鄭致得鄭伯之辭也

士魴來聘且拜師 冬楚子囊秦庶長無地伐宋師于

揚梁以報晉之取鄭也 公如晉朝且拜士魴之辱禮

也 十三年春公至自晉孟獻子書勞于廟禮也 荀

瑩士魴卒晉侯蒐于繇上以治兵使士匄將中軍辭曰

伯游長昔臣習於知伯是以佐之非能賢也請從伯游

荀偃將中軍士匄佐之使韓起將上軍辭以趙武又使

欒黶辭曰臣不如韓起韓起願上趙武君其聽之使趙

武將上軍韓起佐之欒黶將下軍魏絳佐之新軍無帥

晉侯難其人使其什吏率其卒乘官屬以從於下軍禮

也晉國之民是以大和諸侯遂睦君子曰讓禮之主也  
范宣子讓其下皆讓欒黶為汰弗敢違也晉國以平數  
世賴之刑善也夫一人刑善百姓休和可不務乎書曰  
一人有慶兆民賴之其寧惟永其是之謂乎周之興也  
其詩曰儀刑文王萬邦作孚言刑善也及其衰也其詩  
曰大夫不均我從事獨賢言不讓也世之治也君子尚  
能而讓其下小人農力以事其上是以上下有禮而讒  
慝黜遠由不爭也謂之懿德及其亂也君子稱其功以

加小人小人伐其技以馮君子是以上下無禮亂雲竝  
生由爭善也謂之昏德國家之敝恒必由之 鄭良霄

大宰石彘猶在楚石彘言於子囊曰先王卜征五年而  
歲習其祥祥習則行不習則增修德而改卜今楚實不  
競行人何罪止鄭一卿以除其偏使睦而疾楚以固於  
晉焉用之使歸而廢其使怨其君以疾其大夫而相牽  
引也不猶愈乎楚人歸之 十四年春吳告敗于晉會  
于向為吳謀楚故也范宣子數吳之不德也以退吳人



執莒公子務婁以其通楚使也將執戎子駒支范宣子親數諸朝曰來姜戎氏昔秦人迫逐乃祖吾離于瓜州乃祖吾離被莒葢蒙荆棘以來歸我先君我先君惠公有不腆之田與女剖分而食之今諸侯之事我寡君不如昔者葢言語漏洩則職女之由詰朝之事爾無與焉與將執女對曰昔秦人負恃其衆貪于土地逐我諸戎惠公蠲其大德謂我諸戎是四嶽之裔胄也毋是翦棄賜我南鄙之田狐狸所居豺狼所嗥我諸戎除翦其荆

棘驅其狐狸豺狼以為先君不侵不叛之臣至于今不  
貳昔文公與秦伐鄭秦人竊與鄭盟而舍戍焉於是乎  
有殺之師晉禦其上戎亢其下秦師不復我諸戎實然  
譬如捕鹿晉人角之諸戎掎之與晉踣之戎何以不免  
自是以來晉之百役與我諸戎相繼于時以從執政猶  
殺志也豈敢離邊今官之師旅無乃實有所闕以攜諸  
侯而罪我諸戎我諸戎飲食衣服不與華同贄幣不通  
言語不達何惡之能為不與於會亦無晉焉賦青蠅而

退宣子辭焉使即事於會成愷悌也於是子叔齊子為  
季武子介以會自是晉人輕魯幣而益敬其使 師歸  
自伐秦晉侯舍新軍禮也成國不過半天子之軍周為  
六軍諸侯之大者三軍可也於是知朔生盈而死盈生  
六年而武子卒彘裘亦幼皆未可立也新軍無帥故舍  
之

史記悼公問治國於師曠師曠曰唯仁義為本

國語悼公與司馬侯升臺而望曰樂夫對曰臨下之樂

則樂矣德義之樂則未也公曰何為德義對曰諸侯之

為日在君側以其善行以其惡戒可謂德義矣公曰孰

能對曰羊舌肸習於春秋乃召叔嚮使傅太子彪史記悼公

卒子平公彪立

左傳十五年鄭公孫夏如晉奔喪子蟜送葬

楚共王奮志圖霸晉厲公無道鄭服於楚幸而有鄢

陵之捷乃恃勝而驕亂自內作此楚人所以輕晉也

悼公新立楚納叛人以病宋未幾而又侵之楚之讎

宋以撓晉也諸侯合圍叛臣就執宋乃定焉韓獻子曰成霸安疆必自宋始晉有成謀悼能復疆而楚於是乎始挫哉虛打一會而晉得宋虎牢再役而晉得鄭得宋易得鄭難者宋故屬晉鄭實屬楚也陳近於楚久非晉有難澤來盟於是陳既服晉晉亦輒為陳動無何陳侯以國難逃歸邢丘不至晉不復問焉悼公之於陳也其來則字之去則舍之急在宋鄭故緩在陳此晉國君臣之善謀也夫楚人忿於馮陵之耻

每欲肆其馮陵以圖報晉故狼貪鷲攫日逞兵於陳  
鄭之郊虎牢城而殺申陳叛而殺壬夫蓄怒強忍詎  
宜驟當其銳乎鄭起蔡釁子囊來伐國僑識禍亂之  
萌子駟持兩待之論晉楚之勢既不相下矣悼公不  
欲交其鋒也卷甲息民守之以靜彼出我還示之以  
怯以退為進以不戰為勇故五會以著信三駕以著  
威九合以著和服鄭即止未嘗暴骨原野殘民鋒鏑  
而霸業成矣或謂悼公之復霸也衛人逐君而弗誅

邾莒侵魯而弗討雖外攘日勤而治夏為踈不知悼  
公所處之勢艱於文襄遠矣齊秦方梗強楚方盛享  
國未以志弗良終奚暇稱兵小弱乎君臣之間長慮  
知顧救先急後緩不以黷武為能也和戎睦夏得安  
內攘外之權通吳制楚得近攻遠交之法會鄒釋陳  
賢於齊桓之盟貫蕭魚服鄭易於晉文之勝楚天假  
之年功烈當倍惜年未三十而薨諡之曰悼不亦誠  
可悼哉

次三日月

律史

三十一



繹史卷六十四

欽定四庫全書

史部

鮮史卷六十五  
九

詳校官檢討臣羅國俊

編修臣裴謙覆勘

覆校官博士臣劉光第

校對官中書臣蔣寬

校對官中書臣龔禔身

謄錄監生臣周文彬

謄錄監生臣王宜

欽定四庫全書

續史卷六十五

靈壁縣知縣馬驥撰

宋子罕為政

左傳

襄公  
十年

宋華弱與樂書少相狎長相優又相謗也子

湯怒以弓楛華弱于朝平公見之曰司武而楛于朝難

以勝矣遂逐之夏宋華弱來奔司城子罕曰同罪異罰

非刑也專戮於朝罪孰大焉亦逐子蕩子蕩射子罕之

門田幾日而不我從子罕善之如初九年春宋災樂

喜為司城以為政使伯氏司里火所未至徹小屋塗大屋陳畚揭具緋缶備水器量輕重蓄水潦積土塗巡丈城繕守備表火道使華臣具正徒令隧正納郊保奔火所使華閱討右官官庀其司向戍討左亦如之使樂造庀刑器亦如之使皇鄖命校正出馬工正出車備甲兵庀武守使西鉏吾庀府守令司宮巷伯儆宮二師令四鄉正敬享祝宗用馬於四墉祀盤庚於西門之外晉侯問於士弱曰吾聞之宋災於是乎知有天道何故對曰

古之火正或食於心或食於味以出內火是故味為鶉  
火心為大火陶唐氏之火正闕伯居商邱祀大火而火  
紀時焉相土因之故商主大火商人閱其禍敗之釁必  
始於火是以日知其有天道也公曰可必乎對曰在道

國亂無象不可知也

公羊傳曷為或言災或言火大者曰災小者曰火然則內何以不言

火內不言火者甚之也何以書記災也外災不書此何以書為王者之後記災也穀梁傳外災不志此其志

何也故

十五年

宋人或得玉獻諸子罕子罕弗受獻玉

者曰以示玉人玉人以為寶也故敢獻之子罕曰我以

不貪為寶爾以玉為寶若以與我皆喪寶也不若人有其寶稽首而告曰小人懷璧不可以越鄉納此以請死也子罕寘諸其里使玉人為之攻之富而後使復其所

韓非子宋之鄙人得璞玉而獻之子罕子罕不受鄙人曰此寶也宜為君子罷不宜為細人用子罕曰爾以玉

為寶我以不受子玉為寶是鄙人欲玉而子罕不欲玉故曰欲不欲不貴難得之貨新序故宋國之長者曰

子罕非無寶也所寶者異也今以百金與搏黍以示兒子兒子必取搏黍矣以和氏之璧與百金以示鄙人鄙

人必取百金矣以和氏之璧與道德之至言以示賢者賢者必取至言矣其知彌精其取彌精其知彌拙其取

彌拙子罕之所寶者至矣  
十七年春宋莊朝伐陳獲司徒印卑宋

也 宋皇國父為大宰為平公築臺妨於農收子罕請  
俟農功之畢公弗許築者謳曰澤門之皙實興我役邑  
中之黔實慰我心子罕聞之親執扑以行築者而扶其  
不勉者曰吾儕小人皆有闔廬以辟燥溼寒暑今君為  
一臺而不速成何以為役謳者乃止或問其故子罕曰  
宋國區區而有詛有祝禍之本也

二十九年鄭子展卒子

皮卽位於是鄭饑而未及麥民病子皮以子展之命餼  
國人粟戶一鍾是以得鄭國之民故罕氏常掌國政以

為上卿宋司城子罕聞之曰鄰於善民之望也宋亦饑請於平公出公粟以貸使大夫皆貸司城氏貸而不書為大夫之無者貸宋無饑人叔向聞之曰鄭之罕宋之樂其後亡者也二者其皆得國乎民之歸也施而不德樂氏加焉其以宋升降乎

禮記陽門之介夫死司城子罕入而哭之哀晉人之覘宋者反報於晉侯曰陽門之介夫死而子罕哭之哀而民說殆不可伐也孔子聞之曰善哉覘國乎詩云凡民



有喪扶服救之雖微晉而已天下其孰能當之

○檀弓

呂氏春秋士尹池為荆使於宋司城子罕觴之南家之牆隳於前而不直西家之潦徑其宮而不止士尹池問其故司城子罕曰南家工人也為鞮者也吾將徙之其父曰吾恃為鞮以食三世矣今徙之是宋國之求鞮者不知吾處也吾將不食願相國之憂吾不食也為是故吾弗徙也西家高吾宮卑潦之經吾宮也利故弗禁也士尹池歸荆荆王適興兵而攻宋士尹池諫於荆王曰

宋不可攻也其主賢其相仁賢者能得民仁者能用人  
荆國攻之其無功而為天下笑乎故釋宋而攻鄭孔子  
聞之曰夫修之於廟堂之上而折衝乎千里之外者其  
司城子罕之謂乎宋在三大萬乘之間子罕之時無所  
相侵邊境四益相平公元公景公以終其身其唯仁且  
節與

說苑宋司城子罕之貴子韋也入與共食出與同衾司  
城子罕亡子韋不從子罕來復召子韋而貴之左右曰

君之善子韋也君亡不從來又復貴之君獨不愧於君  
之忠臣乎子罕曰吾唯不能用于子韋故至於亡今吾之  
得復也尚是子韋之遺德餘教也吾故貴之且我之亡  
也吾臣之削迹拔樹以從我者奚益於吾亡哉

○子罕  
之亡未

聞

韓詩外傳昔者司城子罕相宋謂宋君曰夫國家之安  
危百姓之治亂在君之行夫爵祿賞賜舉人之所好也  
君自行之殺戮刑罰民之所惡也臣請當之君曰善寡

人當其美子受其惡寡人自知不為諸侯笑矣國人知  
殺戮之刑專在子罕也大臣親之百姓畏之居不期年  
子罕遂去宋君而專其政故老子曰魚不可脫於淵國  
之利器不可以示人詩曰胡為我作不即我謀

○諸書  
多云然

豈別一司  
城子罕哉

宋之設官以右師為尊司城居六卿之五而子罕為  
政豈非以其賢乎管子之秩不參於高國而齊桓用  
之以霸子罕之位不加於華向而宋國賴之以安故

曰國有賢人社稷之衛也於宋子罕猶信

繹史卷六十五

欽定四庫全書卷

繹史卷六十六

靈壁縣知縣馬驥撰

楚滅庸舒

左傳

文公十年

楚令尹大孫伯卒成嘉為令尹羣舒叛楚

夏子孔執舒子平及宗子遂圍巢

十四年

楚莊王立子

孔潘崇將襲羣舒使公子燮與子儀守而伐舒蓼二子作亂城郢而使賊殺子孔不克而還八月二子以楚子出將如商密廬戡黎及叔麋誘之遂殺鬬克及公子燮

初鬪克囚于秦秦有殺之敗而使歸求成成而不得志  
公子燮求令尹而不得故二子作亂

十六年

楚大饑戎

伐其西南至于阜山師于大林又伐其東南至于陽邱  
以侵訾枝庸人帥羣蠻以叛楚麋人率百濮聚于選將  
伐楚於是申息之北門不啟楚人謀徙於阪高蔣賈曰  
不可我能往寇亦能往不如伐庸夫麋與百濮謂我饑  
不能師故伐我也若我出師必懼而歸百濮離居將各  
走其邑誰暇謀人乃出師旬有五日百濮乃罷自廬以



往振廩同食次于句澁使廬戢黎侵庸及庸方城庸人  
逐之囚子揚窻三宿而逸曰庸師衆羣蠻聚馬不如復  
大師且起王卒合而後進師叔曰不可姑又與之遇以  
驕之彼驕我怒而後可克先君蚡冒所以服陘隰也又  
與之遇七遇皆北唯裨僚魚人實逐之庸人曰楚不足  
與戰矣遂不設備楚子乘馱會師于臨品分為二隊子  
越自石溪子貝自仞以伐庸秦人巴人從楚師羣蠻從  
楚子盟遂滅庸

宣公八年

楚為衆舒叛故伐舒蓼滅之楚

子疆之及滑汭盟吳越而還

成公十七年

舒庸人以楚師

之敗也道吳人圍巢伐駕圍釐虺遂恃吳而不設備楚

公子索師襲舒庸滅之

襄公二十四年

吳人為楚舟師之役

故召舒鳩人舒鳩人叛楚楚子師于荒浦使沈尹壽與

師和犁讓之舒鳩子敬逆二子而告無之且請受盟二

子復命王欲伐之遠子曰不可彼告不叛且請受盟而

又伐之伐無罪也姑歸息民以待其卒卒而不貳吾又

何求若猶叛我無辭有庸乃還

二十五年

舒鳩人卒叛楚

令尹子木伐之及離城吳人救之子木遽以右師先子  
彊息桓子捷子駢子孟帥左師以退吳人居其閒七日  
子彊曰久將墊隘隘乃禽也不如速戰請以其私卒誘  
之簡師陳以待我我克則進奔則亦視之乃可以免不  
然必為吳禽從之五人以其私卒先擊吳師吳師奔登  
山以望見楚師不繼復逐之傳諸其軍簡師會之吳師  
大敗遂圍舒鳩舒鳩潰八月楚滅舒鳩 楚子以滅舒  
鳩賞子木辭曰先大夫為子之功也以與為掩

諸夏之衰也患在不恤小弱而輕棄遠國庸及羣舒與楚接壤皆能糾合與國以牽制於楚舒在楚東庸在楚西穆莊之際咸與楚構怨舒方動則宗巢輔之庸方動則麋濮羣蠻輔之亦荆楚多事之會哉夫舒為偃姓皋陶之苗裔也其類繁多散處江淮之間詩曰荆舒是懲則舒舊黨楚矣庸西方之遠國也武王伐紂誓及庸蜀則庸舊屬周矣庸與中國之絕蓋起於平王東遷之餘舒勢之分蓋始於徐人取舒之後

中國絕則勢孤必伺隙而後動庸乘楚饑申息不啓  
而中國若弗聞焉此則輕棄遠國之患也勢分則謀  
不協故輕舉以取敗羣舒叛楚同歸滅亡而中國若  
弗聞焉此則不恤小弱之患也乃厥貉方會楚執舒  
子為賈決策轉敗為功秦巴通而西國合謀吳越盟  
而東方效順楚由是方洋中夏尚誰能議其後邪迨  
及共康之世舒勢益微即當鄢陵新敗之餘舟師無  
功之日楚猶能一舉而滅舒庸再舉而滅舒鳩自是

舒無遺種焉嗚呼中國不能恤舒而借庇於吳吳人庇舒而亡舒則焉用彼盟主矣

繹史卷六十六

欽定四庫全書

緯史卷六十七

靈壁縣知縣馬驕撰

衛孫甯廢立

列女傳定姜者衛定公之夫人公子之母也公子既娶而  
死其婦無子定姜歸其婦自送之至于野乃賦詩曰  
燕燕于飛差池其羽之子于歸遠送于野瞻望不及泣  
涕如雨送去歸泣而望之又作詩曰先君之思以畜寡  
人君子謂定姜為慈姑

坊記注亦以為定姜詩與  
毛傳異釋文曰此是魯詩

左傳

成公七年

衛定公惡孫林父冬孫林父出奔晉衛侯如

晉晉反戚焉

十四年春衛侯如晉晉侯強見孫林父

馬定公不可夏衛侯既歸晉侯使郤犇送孫林父而見

之衛侯欲辭定姜曰不可是先君宗卿之嗣也大國又

以為請不許將亡雖惡之不猶愈於亡乎君其忍之安

民而宥宗卿不亦可乎衛侯見而復之衛侯有疾使

孔成子甯惠子立敬妣之子衎以為大子冬十月衛定

公卒夫人姜氏既哭而息見大子之不哀也不內酌飲



歎曰是夫也將不唯衛國之敗其必始於未亡人烏呼

天禍衛國也夫吾不獲鱗也使主社稷大夫聞之無不

聳懼孫文子自是不敢舍其重器於衛盡寘諸戚而其

善晉大夫

孔叢子子貢問曰昔孫文子以衛侯哭之不哀知其將為亂不敢舍其重器而行盡寘諸

戚而善晉大夫二十人或稱其知何如孔子曰人知其為知也吾未知其為知也子貢曰敢問何謂也子曰食

其祿者必死其事孫子知衛君之將不君不念伏死以爭而累規去就尸利攜貳非人臣也臣而有不臣之心

明君所不赦幸哉孫子之以此免戮也

襄公七年衛孫文子來聘且拜武子

之言而尋孫桓子之盟公登亦登叔孫穆子相趨進曰

諸侯之會寡君未嘗後衛君今吾子不後寡君寡君未  
知所過吾子其少安孫子無辭亦無悛容穆叔曰孫子  
必亡為臣而君過而不悛亡之本也詩曰退食自公委  
蛇委蛇謂從者也衡而委蛇必折

十四年

衛獻公戒孫

文子甯惠子食皆服而朝日盱不召而射鴻於囿二子  
從之不釋皮冠而與之言二子怒孫文子如戚孫蒯入  
使公飲之酒使大師歌巧言之卒章大師辭師曹請為  
之初公有嬖妾使師曹誨之琴師曹鞭之公怒鞭師曹

三百故師曹欲歌之以怒孫子以報公公使歌之遂誦  
之蒯懼告文子文子曰君忌我矣弗先必死并帑於戚  
而入見蘧伯玉曰君之暴雲子所知也大懼社稷之傾  
覆將若之何對曰君制其國臣敢奸之雖奸之庸知愈  
乎遂行從近闕出公使子蟜子伯子皮與孫子盟于邱  
宮孫子皆殺之四月己未子展奔齊公如郵使子行於  
孫子孫子又殺之公出奔齊孫氏追之敗公徒于阿澤  
郵人執之初尹公佗學射於庾公差庾公差學射於公

孫丁二子追公公孫丁御公子魚曰射為背師不射為戮射為禮乎射兩鞫而還尹公佗曰子為師我則遠矣乃反之公孫丁授公轡而射之貫臂子鮮從公及竟公使祝宗告亡且告無罪定姜曰無神何告若有不可誣也有罪若何告無舍大臣而與小臣謀一罪也先君有冢卿以為師保而蔑之二罪也余以巾櫛事先君而暴妾使余三罪也告亡而已無告無罪公使厚成叔弔于衛曰寡君使瘠聞君不撫社稷而越在他竟若之何不

弔以同盟之故使瘖敢私於執事曰有君不弔有臣不敏君不赦宥臣亦不帥職增淫發洩其若之何衛人使大叔儀對曰羣臣不佞得罪於寡君寡君不以即刑而悼棄之以為君憂君不忘先君之好辱弔羣臣又重恤之敢拜君命之辱重拜大貺厚孫歸復命語臧武仲曰衛君其必歸乎有大叔儀以守有母弟鱣以出或撫其內或營其外能無歸乎齊人以邾寄衛侯及其復也以邾糧歸右宰穀從而逃歸衛人將殺之辭曰余不說初

矣余狐裘而羔袖乃赦之衛人立公孫剽孫林父甯殖  
相之以聽命於諸侯衛侯在邾臧紇如齊唁衛侯衛侯  
與之言雲退而告其人曰衛侯其不得入矣其言糞土  
也亡而不變何以復國子展子鮮聞之見臧紇與之言  
道臧孫說謂其人曰衛君必入夫二子者或輓之或推  
之欲無入得乎 師曠侍於晉侯晉侯曰衛人出其君  
不亦甚乎對曰或者其君實甚良君將賞善而刑淫養  
民如子蓋之如天容之如地民奉其君愛之如父母仰

之如日月敬之如神明畏之如雷霆其可出乎夫君神之  
主而民之望也若困民之主匱神乏祀百姓絕望社  
稷無主將安用之弗去何為天生民而立之君使司牧  
之勿使失性有君而為之貳使師保之勿使過度是故  
天子有公諸侯有卿卿置側室大夫有貳宗士有朋友  
庶人工商阜隸牧圉皆有親暱以相輔佐也善則賞之  
過則匡之患則救之失則革之自王以下各有父兄子  
弟以補察其政史為書瞽為詩工誦箴諫大夫規誨士

傳言庶人謗商旅于市百工獻藝故夏書曰道人以木  
鐸徇于路官師相規工執藝事以諫正月孟春於是乎  
有之諫失常也天之愛民甚矣豈其使一人肆於民上  
以從其淫而棄天地之性必不然矣 晉侯問衛故於  
中行獻子對曰不如因而定之衛有君矣伐之未可以  
得志而勤諸侯史佚有言曰因重而撫之仲虺有言曰  
亡者侮之亂者取之推亡固存國之道也君其定衛以  
待時乎冬會于戚謀定衛也

十七年

衛孫蒯田于曹隧



飲馬于重邱毀其瓶重邱人閉門而詢之曰親逐而君

爾父為厲是之不憂而何以田為夏衛石買孫蒯伐曹

取重邱曹人愬于晉

年十八

夏晉人執衛行人石買于

長子執孫蒯于純留為曹故也

穀梁傳稱行人怨接于上也

年十九

衛石共子率悼子不哀孔成子曰是謂慶其本必不有

其宗

年二十

衛甯惠子疾召悼子曰吾得罪于君悔而

無及也名藏在諸侯之策曰孫林父甯殖出其君君入

則掩之若能掩之則吾子也若不能猶有鬼神吾有餒

而已不來食矣悼子許諾惠子遂卒

二十五年晉侯使魏

舒宛沒逆衛侯將使衛與之夷儀崔子止其帑以求五

鹿

衛獻公入于夷儀

公羊傳陳儀者何衛之邑也曷為不言入于衛諼君以弑也

衛獻公自夷儀使與甯喜言甯喜許之大叔文子聞

之曰烏乎詩所謂我躬不閱皇恤我後者甯子可謂不

恤其後矣將可乎哉殆必不可君子之行思其終也思

其復也書曰慎始而敬終終以不困詩曰夙夜匪懈以

事一人今甯子視君不如奕棋其何以免乎奕者舉棋

不定則不勝其耦而況置君而弗定乎必不免矣九世之卿族一舉而滅之可哀也哉

二十六年衛獻公使子鮮

為復辭敬妣強命之對曰君無信臣懼不免敬妣曰雖然以吾故也許諾初獻公使與甯喜言甯喜曰必子鮮在不然必敗故公使子鮮子鮮不獲命於敬妣以公命與甯喜言曰苟反政由甯氏祭則寡人甯喜告遽伯玉伯玉曰瑗不得聞君之出敢聞其入遂行從近闕出告右宰穀右宰穀曰不可獲罪于兩君天下誰畜之悼子

曰吾受命于先人不可以貳穀曰我請使焉而觀之遂見公於夷儀反曰君淹恤在外十二年矣而無憂色亦無寬言猶夫人也若不已死無日矣悼子曰子鮮在右宰穀曰子鮮在何益多而能亡於我何為悼子曰雖然弗可以已孫文子在戚孫嘉聘於齊孫襄居守二月庚寅甯喜右宰穀伐孫氏不克伯國傷甯子出舍於郊伯國死孫氏夜哭國人召甯子甯子復攻孫氏克之辛卯殺子叔及大子角書曰甯喜弑其君剽言罪之在甯氏

也孫林父以戚如晉書曰入于戚以叛罪孫氏也臣之  
祿君實有之義則進否則奉身而退專祿以周旋戮也  
甲午衛侯入書曰復歸國納之也大夫逆於竟者執其  
手而與之言道逆者自車揖之逆於門者領之而已公  
至使讓大叔文子曰寡人淹恤在外二三子皆使寡人  
朝夕聞衛國之言吾子獨不在寡人古人有言曰非所  
怨勿怨寡人怨矣對曰臣知罪矣臣不佞不能負羈縶  
以從扞牧圉臣之罪一也有出者有居者臣不能貳通

外內之言以事君臣之罪二也有二罪敢忘其死乃行

從近闕出公使止之

公羊傳此讓君以弑也其言復歸何惡剽也曷為惡剽剽之立於是

未有說也然則曷為不言剽之立不言剽之立者以惡衛侯也穀梁傳此不正其日何也殖也立之喜也君

之正也日歸見知弑也

禮記衛獻公出奔反於衛及郊將班邑於從者而后入

柳莊曰如皆守社稷則孰執羈勒而從如皆從則孰守

社稷君反其國而有私也母乃不可乎弗果班衛有

太史曰柳莊寢疾公曰若疾革雖當祭必告公再拜稽

首請於尸曰有臣柳莊也者非寡人之臣社稷之臣也  
聞之死請往不釋服而往遂以禭之與之邑裘氏與縣  
潘氏書而納諸棺曰世世萬子孫毋變也檀弓

左傳衛人侵戚東鄙孫氏愬于晉晉成茅氏殖綽伐茅  
氏殺晉成三百人孫蒯追之弗敢擊文子曰厲之不如  
遂從衛師敗之圍雍鉏獲殖綽復愬于晉 晉人為孫  
氏故召諸侯將以討衛也夏中行穆子來聘召公也  
六月公會晉趙武宋向戌鄭良霄曹人于澶淵以討衛

疆戚田取衛西鄙懿氏六十以與孫氏趙武不書尊公也向戍不書後也鄭先宋不失所也於是衛侯會之晉人執甯喜北宮遺使女齊以先歸衛侯如晉晉人執而囚之於士弱氏

公羊傳此執有罪何以不得為伯討不以其罪執之也

秋七月

齊侯鄭伯為衛侯故如晉晉侯蒹享之晉侯賦嘉樂國景子相齊侯賦蓼蕭子展相鄭伯賦緇衣叔向命晉侯拜二君曰寡君敢拜齊君之安我先君之宗祧也敢拜鄭君之不貳也國子使晏平仲私於叔向曰晉君宣其



明德於諸侯恤其患而補其闕正其違而治其煩所以  
為盟主也今為臣執君若之何叔向告趙文子文子以  
告晉侯晉侯言衛侯之罪使叔向告二君國子賦轡之  
柔矣子展賦將仲子兮晉侯乃許歸衛侯叔向曰鄭七  
穆罕氏其後亡者也子展儉而壹鄭伯歸自晉使子  
西如晉聘辭曰寡君來煩執事懼不免於戾使夏謝不  
敏君子曰善事大國衛人歸衛姬于晉乃釋衛侯君  
子是以知平公之失政也

二十七年衛甯喜專公患之公

孫免餘請殺之公曰微甯子不及此吾與之言矣事未可知祇成惡名止也對曰臣殺之君勿與知乃與公孫無地公孫臣謀使攻甯氏弗克皆死公曰臣也無罪父子死余夏免餘復攻甯氏殺甯喜及右宰穀尸諸朝石惡將會宋之盟受命而出衣其尸枕之股而哭之欲斂以亡懼不免且曰受命矣乃行子鮮曰逐我者出納我者死賞罰無章何以沮勸君失其信而國無刑不亦難乎且鮑實使之遂出奔晉公使止之不可及河又使

止之止使者而盟於河託於木門不鄉衛國而坐木門  
大夫勸之仕不可曰仕而廢其事罪也從之昭吾所以  
出也將誰愬乎吾不可以立於人之朝矣終身不仕公  
喪之如稅服終身公與免餘邑六十辭曰唯卿備百邑  
臣六十矣下有上祿亂也臣弗敢聞且甯子唯多邑故  
死臣懼死之速及也公固與之受其半以為少師公使  
為卿辭曰大叔儀不貳能贊大事君其命之乃使文子  
為卿

公羊傳衛殺其大夫甯喜則衛侯之弟鱄曷為出奔晉  
為殺甯喜出奔也曷為為殺甯喜出奔衛甯殖與孫林  
父逐衛侯而立公孫剽甯殖病將死謂喜曰黜公者非  
吾意也孫氏為之我卽死女能固納公乎喜曰諾甯殖  
死喜立為大夫使人謂獻公曰黜公者非甯氏也孫氏  
為之吾欲納公何如獻公曰子苟納我吾請與子盟喜  
曰無所用盟請使公子鱄約之獻公謂公子鱄曰甯氏  
將納我吾欲與之盟其言曰無所用盟請使公子鱄約

之子固為我與之約矣公子鱒辭曰夫負羈繫執鈇鎖從君東西南北則是臣僕庶孽之事也若夫約言為信則非臣僕庶孽之所敢與也獻公怒曰黜我者非甯氏與孫氏凡在爾公子鱒不得已而與之約已約歸至殺甯喜公子鱒挈其妻子而去之將濟于河攜其妻子而

與之盟曰苟有履衛地食衛粟者昧雉彼視

穀梁傳稱國以殺罪

累上也甯喜弒君其以累上之辭言之何也嘗為大夫與之涉公事矣甯喜出君弒君而不以弒君之罪罪之者惡獻公也專喜之徒也專之為喜之徒何也已雖急納其兄與人之臣謀弒其君是亦弒君者也專其曰弟

何也專有是信者君賂不入乎喜而殺喜是君不直乎  
喜也故出奔晉織絢卽鄆終身不言衛專之去合乎春  
秋新語春秋書衛侯之弟鱣出奔晉書鱣絕骨肉之  
親棄大夫之位越先人之境附他人之域窮涉寒饑織  
履而食不明之効也

呂氏春秋  
郈成子為魯聘於晉過衛右宰穀臣止而觴  
之陳樂而不樂酒酣而送之以璧顧反過而弗辭其僕  
曰鄉者右宰穀臣之觴吾子也甚懼今侯濞過而弗辭  
郈成子曰夫止而觴我與我懼也陳樂而不樂告我憂  
也酒酣而送之我以璧寄之我也若由是觀之衛其有

亂乎倍衛三十里聞甯喜之難作右宰穀臣死之還車而臨三舉而歸至使人迎其妻子隔宅而異之分祿而食之其子長而反其璧孔子聞之曰夫智可以微謀仁可以託財者其邠成子之謂乎

左傳

二十八年

衛人討甯氏之黨故石惡出奔晉衛人立其

從子圃以守石氏之祀禮也

昭公七年

秋八月衛襄公卒

晉大夫言於范獻子曰衛事晉為睦晉不禮焉庇其賊人而取其地故諸侯貳詩曰鷓鴣在原兄弟急難又曰

死喪之威兄弟孔懷兄弟之不睦於是乎不弔況遠人誰敢歸之今又不禮於衛之嗣衛必叛我是絕諸侯也獻子以告韓宣子宣子說使獻子如衛弔且反戚田衛齊惡告喪于周且請命王使成簡公如衛弔且追命襄公曰叔父陟恪在我先王之左右以佐事上帝余敢忘

高圉亞圉

穀梁傳卿曰衛齊惡今日衛侯惡此何為君臣同名也君子不奪人名不奪人親之所名

重其所以來也王父名子也

衛孫氏以武公之裔為國正卿良夫執政其子林父



繼之世祿驕恣定公惡其專也於是懷私邑以出奔  
既又挾大國以求復怙惡無君自定公之世而已極  
矣乃殖也以甯俞之孫賢大夫之後而專國不臣比  
於林父父子弑逆宗祀忽諸是以君子惜焉夫獻公  
無道居喪不感林父聞之寘重器於私邑懷二心是  
事君奚復能久射鴻小矢遂啓釁端巧言之譴輒謀  
廢立且公之出也戎由孫氏殺公子而敗公徒試問  
之殖殖固弗與聞也雖名在諸侯之策孫甯同誅若

論首惡端歸林父寯氏於此無乃有悔心乎旣已偕  
立殤公難以變計瀕死戒子務期掩惡曰若能納君  
則吾子也否則鬼不來食矣其辭哀切寯喜聽焉背  
剽逆術再犯大逆從父命而乖臣節然猶曰殤之賊  
獻之勲也彼林父何如哉奉殤不終讎獻不忘據邑  
叛國終無悛志乃獻公之於寯喜輒以其專殺之晉  
克鄭瑕前後一轍而孫氏獨洋洋自得坐享懿氏之  
六十奏樂擊鐘無所顧慮澶淵之會獻曾無一言以

祈翦滅焉子鱣致怨而託木門石惡懼禍而適異國  
賞罰無章其誰服之雖然孫氏之所以不誅實由晉  
庇之也昔良夫之執政也事晉惟堅而結於晉之卿  
大夫尤固鞏之戰則從卻克矣唐谷如之伐則從荀  
庚矣林父之始出奔也以戚屬晉及其歸衛之後晉  
厲公為會則盟于戚悼公謀鄭則會于戚城虎牢則  
會于戚通吳則會于戚以孫氏之食采忽為諸侯之  
孔道無非倚霸國之勢重以震動其君既而遂獻立

殤晉為之會獻入出奔晉為之主凡晉國之君臣皆  
孫氏黨也獻公何能問乎晉既不能納獻又聽林父  
之愬為臣執君是平公之再失政也故孫甯無君其  
惡一也林父附晉則親之喜背晉則執之殖喜無君  
其惡一也殖附晉則縱之喜背晉則殺之晉之於人  
國也罪其不附已者而已矣

繹史卷六十七